

DÊPÄ TÎ PÖPÖKÖDÖRÖ TÎ NDIÄ TÎ BATA NENGÖ TERÊ TÎ ZO

TAKAPA

Na hîngängö bîanî atene nêngö terê tî zo na lîngbîngö terê tî ângangü tî lo laâ sî ayeke na gündâ tî zarä , tî nzönî ngbanga na tî sîrîrî na ndö tî dîniâ,

Na hîngängö nî pëpëe na kêngö ândiä tî bata nêngö terê tî zo laâ adü kpälê tî birä sô abi ngonzo na bê tî âhalëzo, ngâ sî gängö tî mbênî finî ködörö sô âhalëzo kûe alîngbi tî tene tënë tî bê tî âla, tî mabê tî âla afa nî tîngana taâ kötâ békü tî âzo tî ndö tî gîgî,

Ayeke kötâ yê mîngi tî tene azî lê na ndö tî ândiä tî bata nêngö terê tî zo gî na lêngö mbênî gerê tî ndiä ndâli tî sîönî sêgbîä na lêngö pâsi,

Na hîngängö nî atene ayeke kötâ yê mîngi tî mü ngangü na mäingö tî lêngö sîngö na pöpö tî ködörö ndê ndê,

Na hîngängö nî atene na yâ tî sêndiä halëzo tî bendo tî gîgî afa tî finî nî mabê tî âla na âtaâ ndiä tî zo , na nêngö terê ngâ na kötâ tî zo na lîngbîngö terê tî ângangü tî kôlî na wâlî, sî âla atene ânî yeke sâra ngangü kûe tî mäingö tî sêduti tî zo na lêngö ânzönî lëgê tî duti na yâ tî mbênî kötâ zarä ,

Na hîngängö nî atene âködörö sô abûngbi amû yângâ tî lê kpêngö ndiä tî bata nêngö terê tî zo na zarä tî lo na yâ tî kua tî maboko na maboko na bûngbi tî bendo tî gîgî,

Na hîngängö atene mângbîngö bê na ândiä sô na âzarä sô ngâ ayeke bîanî ngangü yê mîngi tî sâra kua sô gî na pekö tî yângâ sô âla mü,

Kötâ Lîngö

Avûnga

Dêpä tî pöpöködörö tî bätängö nêngö terê tî zo sô

tîngana kunibê sô halëzo na âködörö kûe alîngbi tî wara, sî âzo kûe ngâ na âkündü tî bôso kûe asâra ngangü, na lëgê tî fängö mbëtî na fängö-ndo, tî lê kpêngö ândiä na âzarä sô ngâ tî sâra na kodê tî ândiä tî ködörö wala tî pöpöködörö tî tene ayêka nî ngâ sî alê tambûla nî na ndo kûe, na pöpö tî halëzo na letâa nî sô alü mbere nî, tîngana âla sô angbâ na gbe tî lê tî âla.

Sura 1

Adü âzo kûe yamba, ngâ âla lîngbi terê na lëgê tî nêngö-terê na tî ângangü. Ala kûe awara ndarä na börö-li sî âla lîngbi tî duti na âmbâ tî âla gî na lêngö sîngö.

Sura 2

Zo ôko ôko alîngbi tî pîka kate na ndö tî ângangü sô dêpä avûnga, na sârängö kângbi ôko pëpë wala na ndö tî tenê tî marä, wala tî nzoroko tî terê wala tî ndiä wala tî kôlî na wâlî tî yângâ ködörö wala tî mosoro, tî ndo tî düngö wala tî marä duti,

Na ndönî kûe, alîngbi tî sâra mbênî kângbi ôko pëpë sô alöndö na ndö tî tënë tî porosö wala tî ndiä wala tî pöpöködörö, tî mbênî zo wala tî mbênî ködörö nî sô alîngbi tî duti lipandä wala na gbe lê tî mbênî ködörö wala sô ayeke na kpälê tî sêgbîä.

### Sura 3

Zo kûê ayeke na ngangü tî dutî na finî tî lo, tî dutî yamba na tî dutî na mbeto tî wara siônî pëpëe.

### Sura 4

Zo ôko alîngbi tî dutî na gbe tî ngbâa pëpëe. Akânga lêgë bîanî na dutî tî ngbâa ngâ na dëngö buzë tî kängö zo na ngbâa.

### Sura 5

Zo ôko alîngbi tî sâra mbâ tî lo na pâsi tî ponön wala na pâsi tî finön pëpëe.

### Sura 6

Zo kûê ayeke na ngangü tî tene ndiä abata lo na âsiônî lâkûê na ndo kûê.

### Sura 7

Azo kûê alîngbi terê na lê tî ndiä, ngâ âla yeke na ngangü lêgë ôko na särängö kângbi ôko pëpëe. Amû na âla ngangü na sêbätängö terë lêgë ôko, na tënë tî kângbi tî marä sô alîngbi tî fîngi dëpä sô ngâ na tënë tî gîngö lêgë tî kângbi tî marä sô.

### Sura 8

Zo kûê alîngbi tî lî ngbanga na âdangbanga tî ködörö tî lo tòngana âzo akpë pëpëe ângangü sô sëndiä tî ködörö tî lo amû na lo.

### Sura 9

Alîngbi ôko pëpëe tî gbû zo na kânga wala tî bata lo na kânga wala tî tokua zo yongôro na ködörö tî lo gî sêngê sêngê, tòngana ndâ nî ayeke da pëpëe.

### Sura 10

Zo kûê ayeke na ngangü, lêgë ôko na âmbâ tî lo, tî tene amä polêlê tënë tî yângâ tî lo na lê tî boro ngbanga sô fadë afa ânde wala ângangü wala âkuandiä tî lo wala tòngana pängö îrî na tënë sô alî ngbanga da na ndö tî lo sô ayeke mbîrîmbîrî.

### Sura 11

Zo kûê sô apă îrî tî lo na ndö tî mbênî kpälê angbâ mokondö asî na ngôi sô afa na lêgë tî ndiä atene lo sâra siônî, na lê tî mbênî ngbanga tî polêlê sô âwakokö kûê adu da na pekö tî lo.

Alîngbi pëpëe tî kânga zo ndâli tî âyê sô lo sâra wala tî bégirisa sô, na ngôi sô asî sô, ndiä tî ködörö wala ndiä tî pöpöködörö afa nî tòngana kpälê pëpëe. Lêgë ôko, alîngbi tî dîko pëpëe mbênî ponön sô akono ahön ndö tî lo sô ayeke dë ka nî na ngôi sô zo asâra kpälê sô.

### Sura 12

Alîngbi ôko pëpëe tî yôro terê na mbänä na yâ tî sêdutî tî zo wala tî sêwa tî lo wala tî da tî lo wala tî dîko mbëtisû tî lo. Alîngbi pëpëe tî buba îrî tî zo ngâ na wüngö tî îrî tî lo. Zo kûê ayeke na ngangü tî tene ndiä abata lo ngbanga tî âmarä kpälê tòngasö.

## Sura 13

Zo kûe ayeke na ngangü tî fonon yamba na yâ tî ködörösêse kûe. Lo yeke ngâ na ngangü tî soro ndo tî dutî tî lo na yâ tî mbênî ködörösêse.

Zo kûe ayeke na ngangü tî sîgî na yâ tî ködörösêse kûe atâ adu ködörö tî lo, ngâ tî kîri na ködörö nî tóngana sô bê tî lo ayê.

## Sura 14

Na yâ tî ponön tî hongando, amû lêgê na zo kuê tî gi ndo tî dutî da ngâ lo lîngbi tî wara nî na ködörö wandê.

Alîngbi pëpëe tî mû ngangü sô na wakpälê tî fängö zo wala na zo tî särängö âyê sô ague pëpëe na lêgê tî âpo na âkunibê tî bûngbi tî bendo tî gîgî.

## Sura 15

Amû ngangü na zo kûe tî tene lo du zo tî mbênî ködörösêse.

Alîngbi pëpëe tî gbânzi mbêni zo na mbänä tî du waködörösêse ngâ na ngangü tî gbîan ködörösêse tî lo.

## Sura 16

Asî na ngôî sô âla lîngbi tî mû terê, amû ngangü na kôlî na wâlî tî mû terê tóngana kôlî na wâlî, sî âla lê sewä sêngê, tënë tî marä wala tî ködörösêse wala tî mabê alîngbi tî kânga lêgê nî pëpëe. Na mbâgê tî mûngö terê, amû ngangü, lêgê ôko na kôlî na wâlî na yâ tî dutîngö tî âla ngâ na kängbîngö tî âla.

Kôlî na wâlî alîngbi tî mû terê gi tóngana bê tî âla ûse kûe ayê tënë nî bîanî.

Sewä ayeke na gûndâ tî halêzo. Ni laâ, amû ngangü na letäa ngâ na âzo kûe tî tene âla bata nî ngangü.

## Sura 17

Zo kûe wala lo dutî na bôsôngbi wala lo dutî lo ôko ayeke na ngangü tî wara âkûngbâ tî lo mvenî.

Alîngbi pëpëe tî mû âkûngba tî mbênî zo na ngangü na mabôko tî lo.

## Sura 18

Amû na zo kûe zarä tî bibê, tî boro-li na tî mabê ; ngangü sô afa atene zo kûe ayeke na zarä tî gbîan mabê tî lo, wala bibê tî lo ngâ na zarä tî fa polêlê mabê ti lo, lo ôko wala na yâ tî mbênî bûngbi, polêlê wala koiko, na lêgê tî fängö mbëtî, tî särängö yê, tî vöröngö nzapâ ngâ na särängö ângôbo.

## Sura 19

Amû na zo kûe ngangü tî zarä tî bibê na tî särängö tënë. Sô atene alîngbi tî doroko zo pëpëe ndâli tî âbibê tî lo. Amû ngâ na zo kûe ngangü tî gi, tî wara na tî vûnga âsango na âkodê na âmarä lêgê kûe, na zîängö bê pëpëe na ndô tî tënë tî âmekä.

## Sura 20

Amû na zo kûê ngangü tî zarä tî gbë lïngö, tî lï na yâ tî bôsôngbi tî sirîrî.

Alîngbi pëpëe tî gbû zo na ngangü tî lï na yâ tî mbênî bôsôngbi.

#### Sura 21

Amû na zo kûê ngangü tî sâra kua tî lëngö ködörö tî lo, wala lo mvenî wala na lëgë tî âwasêlê sô asoro âla yamba.

Amû na zo kûê ngangü tî wara kua na yâ tî ndokua tî letäa, lëgë ôko na âmbâ tî lo.

Kunibê tî halëzo ayeke na gündâ tî ngangü tî awalëngö ködörö. Kunibê sô alîngbi tî fa gï na lëgë tî aboro soro sô ayeke bâa gïgï ngöi na ngöi, na lêge tî gbegô mobimba ngâ na köbö soro wala na mbênî ngöbo sô amû ngangü tî zarä tî soro.

#### Sura 22

Zo kûê tïngana wabôso tî halëzo ayeke na ngangü na kodëkua tî bätängö terê. Alöndö na âbängö nzönî na pekô tî ângangü tî mosoro, tî zängbingörö terê, tî ndara sô ayeke kötâ yê ndâli tî nëngö terê na boro mäingö tî sêterê tî lo; gï na lëgë tî gbüngö mbîrîmbîri kua tî ködörö ngâ na tî tängbingö kua na âködörö wandë sô abäa dôngôngbi na môsôrô tî ködörö ôko ôko.

#### Sura 23

Amû na zo kûê ngangü tî sâra kua, na zarä tî söröngö kua tî bê tî lo, na yâ tî boro ngâ na nzönî gerê tî kua. Alîngbi ngâ tî bata zo ngbanga tî tënë tî ponön tî särängö kua pëpëe.

Zo kûê alîngbi tî wara boro nginza tî kua sô alîngbi na kua sô lo sâra

Zo sô asâra kua alîngbi tî wara boro nginza tî kua sô alîngbi tî tene lo na âsëwä tî lo adutî na yâ tî nëngö terê. Na ndönî kûê, amû na lo anzîna ngangü tî sêbätängö terê.

Zo kûê awara ngangü tî kîi na âmbâ tî lo âbûngbi tî âwakua, ngâ tî lï bûngbi na âmbênî âbûngbi tî âwakua ngbanga tî gbüngö kokö tî âla.

#### Sura 24

Amû na zo kûê ngangü tî woterê tî lo, tî sâra ngîa ngâ. Sô atene alîngbi tî dë gï na lëgë nî lăngö kâpâ tî kua ngâ na âlăngö tî wöngö terê sô afûta nî.

#### Sura 25

Zo kûê alîngbi tî wara nginza sô alîngbi na lo sî lo lë sênî tî lo, nzönî dutî tî lo ngâ na tî sewä tî lo bianî na lëgë tî têngö kôbe, yüngö bongö, müngo yoro ngâ na zängbingö terê. Amû na lo ngangü tî bâa nzönî na lëgë tî zängbingö terê na ngöi sô lo du na kua pëpëe, wala na ngöi tî söngö terê wala ngbanga tî zën, wala ngbanga tî ndü, tî kangba wala na yâ tî âmbênî ngöi sô zo nî ayeke na mbênî lëgë tî bätängö na finî tî lo pëpëe, na pekô tî âmbênî siökpälê sô asî na lo.

Awâlî tî ngo na âmolengê tî âla alîngbi tî wara taâ nzönî na kua tî zängbingö ndo. Amôlengê kûê, wala adü âla na yâ tî müngö terê wala adü âla da pëpëe ayeke na ngangü na nî lëgë ôko.

#### Sura 26

Amû na zo kûê ngangü tî mändängö mbetî. Ayeke fûta mändängö mbetî nî pëpëe, mbîrîmbîrî na âkêtê dambetî. Mändängö kodëyê na kodëkua alîngbi tî gbû ndo kûe. Zo kûê alîngbi tî manda mbetî na kötâ dambetî, gî na lêgë tî kodë tî lo na hîngängö ndo tî lo.

Fängö mbetî alîngbi tî gue na lêgë tî kono sêterê tî âzo ngâ tî kono ndiä tî bätängö nëngö terê tî âzo . Lo lîngbi ngâ tî mû lêgë tî kpêngba mängö terê, vürüngö bê na sôngö na pöpö tî âködörösêse tî âmarä wala âmabê ndê ndê ngâ na mäïngö âkua tî bûngbi tî bendo tî gîgî ngbanga tî bata sîrîrî.

Awadüngö môlengê âmvenî alîngbi tî soro yamba kodë lêgë tî fängö hîngägö ndo na âmôlengê tî âla.

## Sura 27

Zo kûê ayeke na ngangü tî lê kua tî sêndägao tî âsöngö tî lo, tî tene lo wara âpendere yê tî ködörö tî lo na lo zîa maboko na mäïngö tî âsêndâyê ngâ na lo bâa nzônî na pekô nî.

Amû na zo ôko ôko ngangü tî sêbätängö ânzônî yê tî lo sô alîngbi tî dutî âkûngbâ wala âbibê ti lo-mvenî. Anzônî yê sô alîngbi tî löndö na pekô tî âkodëkua, asêndâyê, âsêndâsû wala tî sêndägao sô lo mvenî lo sâra.

## Sura 28

Tî tene âzo akpë ângangü sô afa ge sô, ayeke nzônî mbênî dôngôngbi adu da sô alîngbi tî bata nî. Dôngôngbi sô alîngbi tî dutî na yâ tî ködörö nî töngana na yâ tî dûniâ mobimba.

## Sura 29

Zo ayeke na âhonga na mbâgë tî bôso sô lo du da sî lo mâi da yamba . Nî laâ sî alîngbi tî mû na lo lêgë tî tene sêterê tî lo amâi nzônî bîanî.

Ndiä alîngbi tî lê ângangü tî bätängö nëngö terê tî zo . Lo lîngbi ngâ tî mû lêgë na zo ôko ôko tî kpë âmbâ tî lo ngâ tî tene âmbâ tî lo akpë lo.

ângangü sô na âzarä sô alîngbi ôko pëpë tî fîngi âwêsêlô, âpö, na gbegôndiä tî bûngbi tî bendo tî gîgî mobimba.

## Sura 30

Mbênî ködörösêse ôko pëpëe wala mbênî zo tî gîgî ôko alîngbi pëpëe tî buba lêgë tî ândiä sô afa ge na yâ tî mbetî-dêpâ sô.